



河南先生文集卷第二十六

五代春秋

梁太祖

開平元年四月甲子帝即位于汴州戊辰改元建汴
州為東都改京師為西都五月李思安帥師及晉人
戰于潞城思安師敗績

二年正月晉王克用薨三月壬申帝幸東都征潞州
丁丑次澤州晉人還師四月丙午帝還東都五月晉
人救潞州破夾城遂攻澤州六月戊申淮南張灝誅

其君偃吳人誅張灝秦人來寇雍州同州劉知俊敗
秦師于幕谷八月晉人來侵晉州九月丁丑帝西征
次陝州十月丁巳帝還東都楚人克朗州殺雷彥恭
三年正月甲戌帝幸西都辛卯帝祀上帝于圓丘三
月甲戌帝幸河中四月同州劉知俊伐秦克廊坊丹
延四州五月巳卯帝還西都殺雍州王重師六月同
州劉知俊叛附于秦辛亥帝西征次陝州劉知俊奔
秦幽州劉守光伐滄州執其兄守文以歸七月晉人
來攻晉州乙亥帝還西都八月楊師厚帥師援晉州

晉人還師十一月甲午帝告謝于園丘秦人來侵靈
州陝州康懷英侵秦克寧慶衍三州秦人來襲懷英
師敗于昇平

四年正月燕王守光克滄州五月鄴王紹威薨八月
晉人秦人來侵夏州庚寅帝西征次陝州九月巳丑
帝還西都十一月趙王鎔定州王處直附于晉王景
仁帥師北討次于栢鄉乾化元年正月丙戌朔日有
食之王景仁及晉王趙人戰于栢鄉景仁師敗
績晉師圍邢州二月晉師侵魏州楊師厚帥師援邢

州晉人還師五月改元南海王隱薨六月晉人來侵
湯陰九月帝北征次魏縣十月延州高萬興克鹽州
十一月壬辰帝還西都

五年二月甲子帝北征次日州侵趙克棗強進次蔣
縣圍之晉人救蔣帝還師滄州張萬進以地歸四月
己巳帝遂幸東都帝不豫五月甲申還西都薛貽矩
薨六月戊寅皇子友珪弒逆帝崩于寢殿殺友文八
月河中朱友謙附于晉康懷英帥師攻河中晉人救
河中十月懷英師敗于白涇嶺十一月甲寅葬太祖

皇帝于宣陵

末帝

乾化三年二月帝即位于東都誅友珪西都軍大掠
殺杜曉五月楊師厚帥師侵趙十二月晉王克幽州
以燕王守光歸晉陽誅之

四年七月晉人來侵邢州九月徐州蔣殷叛附于吳
牛存節帥師討徐州吳人救徐州存節敗吳師于城
下

正明元年正月牛存節克徐州誅蔣殷三月魏博賀

德倫叛于晉汾州李保衡以地來歸六月晉王入魏
以賀德倫歸晉師遂取德州七月劉邠帥師侵晉十
月誅友攷十一月改元

二年二月王檀帥師侵晉攻晉陽不克劉邠及晉王
戰于元城邠師敗績三月晉人取潞州衛州六月晉
人衛邢州七月相州張筠逃歸相州入于晉邠州閻
寶叛以地入于晉滄戴思遠逃歸滄州入于晉晉人
又取貝州盜殺鄆州王檀

三年二月晉人來侵黎陽十二月己巳帝幸西都晉
人來取楊劉

四年正月晉人來侵鄆州己卯帝還東都謝彥章帥
師侵晉攻楊劉晉王救楊劉彥章及晉王戰彥章師
敗績十二月賀瓌殺謝彥章賀瓌及晉王戰于胡柳
坡晉師敗績是夕再戰瓌師敗績晉人遂取漢陽邠
州李保衡以地來歸

五年正月晉人城德勝夾河為柵三月兖州張守進
叛附于晉四月賀瓌帥師攻勝德南城不克八月王
瓚帥師侵晉十月劉邠克兖州誅張守進十二月王

瓚及晉王戰于河曲瓚師敗績

六年春河中朱友謙襲陷同州六月劉鄩帥師圍同州九月晉李嗣昭救同州劉鄩及晉李嗣昭戰剽師敗績

龍德元年三月趙人張文禮弒其君鎔四月陳州友能反師圍陳州七月友能降赦之八月晉閻寶帥師討張文禮十月戴思遠帥師侵晉攻德勝北城晉王救德勝思遠及晉王戰于戚城思遠師敗績定州王處直為其子都所廢

二年正月戴思遠侵晉取成安遂攻勝德北城晉王敗契丹于新城二月晉王救德勝思遠退師八月敗凝帥師攻晉衛州克之晉李存審克鎮州誅張文禮三年三月潞州李繼韜以地來附四月晉人來取鄆州五月王彥章帥師侵晉攻德勝南城克之晉師棄德勝北城保楊劉王彥章圍楊劉不克八月敗凝帥師侵晉十月辛未朔日有食之晉王來襲中都王彥章師敗于中都彥章攻于師晉師迫京師戊寅帝崩于建國樓下

後唐莊宗神閻皇帝

同光元年四月乙巳帝即位于鄴都十月戊寅滅梁
已卯帝至汴州誅敬翔李振十二月庚午帝至京師
誅潞州李繼韜

二年正月契丹來寇幽州庚申帝幸河陽辛酉帝迎
皇太后至京師二月己巳帝祀上帝于圜丘四月秦
王茂正薨盜據潞州五月克之十一月癸卯帝畋于
伊闕丙午帝還帝師十二月庚午帝及皇后劉氏幸
張全義第

三年正月契丹來寇幽州庚子帝幸鄴都遂幸德勝
故城庚辰帝還京師四月辛亥朔日有食之趙光胤
薨大旱秋大水七月皇太后曹氏崩九月皇子繼岌
郭在韜伐蜀十月葬皇太后于坤陵十一月蜀王衍
降

四年正月皇子繼岌害郭崇韜于蜀帝殺弟存義及
李繼麟二月康延孝據漢州拒命盜發貝州陷鄴都
李嗣源帥師討鄴都三月任圜帥師克漢州誅康延
孝李嗣源入于鄴都殺王衍乙丑帝幸汴州次中牟

李嗣源入汴州帝還京師四月丁亥朔郭從謹弒逆
帝崩于絳霄殿

明宗仁德皇帝

天成元年夏四月丙午帝即位甲寅改元七月葬莊
宗神閭皇帝于雍陵殺豆盧革韋說八月己酉朔日
有食之十月契丹盧文進以地來歸

二年二月誅郭從謹三月荆南高季興叛附于吳盧
臺戍軍亂房知溫討平之十月帝幸汴州戊子次京
水汴州朱守殷拒命己丑帝至汴州誅朱守殷安重

誨害任圜

三年正月帝在汴州四月定州王都拒命王晏球帥
師討定州七月契丹救定州王晏球敗契丹于唐河
幽州起德鈞敗契丹于府西九月誅溫韜凝

四年正月帝在汴州二月王晏球克定州誅王都崔
協薨二月庚午帝還京師四月契丹來寇雲州七月
誅毛璋荆南高興季順命赦之長興元年二月乙卯
祀上帝于圜丘改元九月東川董璋拒命石敬瑭帥
師討璋十二月楚王殷薨薊國公仁矩薨

二年正月契丹突欲率衆來歸五月誅安重誨十一月甲申朔日有食之

三年六月河決衛州西川孟知祥克東川誅董璋京師大水七月越王鏐薨八月湖南馬希聲薨

四年四月夏州李彝超拒命安從進帥師討夏州不克皇子從榮為兵馬元帥十月赦李彝超十一月戊子帝不豫壬午誅從榮戊戌帝崩于雍和殿

閔皇帝長興四年二月癸亥朔帝即位

應順元年正月改元西川孟知祥拒命盜殺安州符

彥超二月鳳翔拒命王思同帥師攻鳳翔不克從珂舉兵向京師康義誠帥師討從珂河中安彥威陝州康思立叛王思同歿于師康義誠以師叛戊辰帝遊于衛州四月壬辰從珂入京師戊寅帝崩于衛州

河南先生文集卷第二十六

河南先生文集卷第二十七

五代春秋

後唐末帝

清恭元年四月庚午帝即位乙酉改元誅康義誠朱
洪昭馮贇丙申葬明宗皇帝于徽陵八月蜀王知祥
薨九月契丹寇雲州

三年四月契丹寇新州六月契丹寇應州十月閩王
延鈞薨大饑

三年五月河東石敬瑭拒命張敬達楊光遠帥師討

河東鄴都軍亂逐劉延皓范延光帥師討平之九月
契丹收河東張敬達及契丹戰于城下敬達師敗績
退師晉安契丹圍晉安戊申帝北征次懷州延安軍
亂殺楊漢章閏十一月楊光遠害張敬達以晉安叛
降于敬塘丁丑帝還京師庚辰敬塘迫京師辛巳帝
崩于玄武樓

晉高祖

天福元年十一月帝在太原宮降制改元閏月庚辰
帝至京師以幽州及鴈門以北地賂契丹十二月乙

酉帝幸河陽餞契丹大相溫

二年春正月乙卯朔日有食之安州盧文進叛奔于

吳三月庚辰幸汴州趙莹使契丹六月大推軍范延

光拒命張從賓以京師叛附于延光從賓殺皇子重

信重義七月誅滑州符彥饒盜殺安州周瓌越王元

瓘殺其弟元林誅張從賓

林思
幸切

三年正月帝在汴州七月作受命寶九月范延光降

赦之十月建汴州為東京馮道使契丹

四年四月廢樞密院七月庚子朔日有食之西京大

水閘人弑其君胡

五年五月安州李金全叛附于吳馬全節帥師討安州吳人救安州全節敗吳師克安州金全奔吳六月放吳俘還

六年五月鎮州安重榮拒命河決滑州八月壬辰帝幸鄴都十月襄州安從政拒命高行周帥師討襄州安重榮舉兵向京師杜重威帥師敗重榮于宗城重榮遁歸越王元瓘薨

七年正月杜重威克鎮州誅安重榮五月帝不豫六月乙丑帝崩于鄴都保昌殿

少帝

天福七年六月乙丑帝即位于鄴都八月高行周克襄州誅安從政大蝗十一月葬高祖皇帝于顯陵

八年二月乙丑帝還東京四月戊申朔日有食之十一月青州楊光遠叛附于契丹契丹入寇大饑

開運元年契丹陷貝州乙酉帝北征次澶州契丹陷博州三月及契丹戰于戚城師敗績甲寅帝還東京六月復樞密院河決滑州七月改元八月閩人朱文

進弒其君延義九月庚午朔日有食之十二丁巳楊光遠降赦之癸酉誅楊光遠契丹入寇大饑

二年正月帝北征二月次澶州三月契丹陷祁州杜威及契丹戰于陽城契丹敗績四月甲申帝還東京八月甲子朔日有食之大饑

三年二月壬戌朔日有食之五月契丹入寇大水十

一月杜威帥師討契丹十二月師次中渡杜威叛以

師入于契丹皇甫遇歿于師相州李彥澤寇京師彥

澤殺桑維翰

四年正月帝遜于北郊契丹德光入京師誅張彥澤

癸卯帝遜于遼陽

漢高祖

元年二月帝即位于太原宮稱天福十二年三月契

丹德光遁歸死藥城五月丙申帝東幸六月殺郃公

從益甲子帝至京師楚王希範薨閏七月鄴都杜威

拒命八月越王弘佐薨九月庚辰帝北征十一月杜

威降赦之十二月癸巳帝至自鄴都

乾祐元年正月乙卯改元帝不預丁丑帝崩于萬歲

殿

隱帝

元年二月辛巳帝即位誅杜威三月河中李守正拒命盜以京兆叛附于守正六月戊寅朔日有食之七月王景從以鳳翔叛附于李守正郭威帥師圍河中越人廢其君侖十一月殺李崧壬申葬高祖皇帝于睿陵

二年二月丙子黑霧四塞五月京兆降六月癸酉朔日有食之郭威克河中誅李正十月契丹入寇十二月趙暉克鳳翔誅王景崇

三年二月初舉樂閏六月癸巳大風拔木十月甲子朔日有食之丙子誅楊邠史弘肇王章鄴都郭威舉兵向京師澶州李弘義滑州宋延涯叛附于郭威甲申慕容彥超帥師及郭威戰于劉子陂帝視師師敗績候益焦繼勳叛乙酉帝崩于師郭威入京師軍大掠乙丑皇太后令丘子贊馮道往徐州迎贊誅蘇逢吉劉銖契丹入寇十二月郭威帥師北討次澶州還師壬戌威入京師楚人馬希範弑其君希廣王峻弑

湘陰公于宋州

周高祖

廣順元年正月丁卯帝即位八月葬漢隱帝楚人弒
希萼十月吳滅楚十二月兖州慕容彥超拒命

二年四月丙戌朔日有食之五月庚辰帝東征戊辰
次兖州城下乙亥克兖州六月戊戌帝至自東征九
月契丹入寇朗州劉言逐吳人復楚地

三年正月以戶部田賜民二月誅王峻六月大水十
二月誅王殷

顯德元年正月丙子朔日帝祀上帝于圜丘改元帝
不豫壬辰帝崩于滋德殿

世宗

顯德元年正月丙申帝即位晉人及契丹寇潞州三
月乙酉帝北征次澤州癸巳及晉人契丹戰于高平
晉人契丹敗績丙戌次潞州誅樊愛能何徽四月葬
高祖皇帝于嵩陵馮道薨五月丙子帝次太原城下
師圍太原不克庚子帝至自太原

二年五月王景帥師伐蜀九月王景敗蜀師于黃花

谷秦成階三州以地來歸十一月克鳳州景範晉王
崇薨

三年正月廣京師外城壬寅帝南征李重進帥師敗
吳師于正陽甲寅帝次正陽吳王來貢方物五月乙
卯帝至自南征七月皇后符氏崩

四年二月乙亥帝南征次下蔡壽州來降四月己巳
帝至自南征十月壬辰帝南征濠泗秦三州來歸

五年正月癸未朔帝次楚州城下師圍其城丙午克
之丁卯次揚州吳王以江北地來獻四月壬申帝至

自南征

六年三月甲戌帝北征五月次瓦橋關寧瀛漢三州
來降帝不豫班師六月甲戌帝至自北征癸巳帝崩
于萬歲殿

恭帝

顯德六年六月甲午帝即位十一月壬寅葬世宗皇
帝于慶陵

七年正月甲辰帝遜位于

我宋

河南先生文集卷第二十七

河南集附錄

本傳

尹洙字師魯河南人天聖二年進士及第絳州正平
縣主簿調河南府戶曹叅軍遷安國軍節度推官知
邵武軍光澤縣舉書判拔萃改山南東道節度掌書
記知河南府伊陽縣縣民有幼女孤而冒賀氏產鄰
人證其非是而籍之後鄰人死女復訴情所籍產久
不能決洙問以若年幾何曰三十二乃按咸平籍二
年賀死而賀妻劉為戶詰之曰若五年始生安得賀

姓耶女遂伏以薦得召試為館閣校勘_遷太子中允會
貶范仲淹榜朝堂洙自言與仲淹有師友之義乃請
罪于朝落校勘復為掌書記監唐州酒稅時西北久
安洙作叙燕戍息二篇以為武備不可弛于世丁父
憂服除復為太子中允知河南府長水縣趙元昊反
大將葛懷敏辟為經略判官後劉平石元孫戰敗朝
廷以夏竦為經略使仲淹韓琦副之復以洙為
判官又詔竦等議攻守計乃具二策令琦與洙詣闕
奏之加集賢校理上命用攻策遂趣延州謀出兵仲

淹持不下還至慶州會任福已敗于好水川因發慶
州部將劉政銳卒數千趨鎮戎軍赴救未至賊引去
夏竦奏洙擅發兵降通判濠州當時言者謂福之敗
由隨軍耿傳督戰太急後得傳書乃戒福使持重毋
輕進者洙以傳文吏無軍責而死行陣被誣作憫忠
辨誣二篇未幾韓琦知秦州辟通判州事加直集賢
院工疏曰文帝盛德之主賈誼論當時事勢猶云可
為痛哭孝武帝外制四夷以疆主威徐樂嚴安尚以
陳勝亡秦六卿篡晉為戒二帝不以危亂滅亡為諱

故子孫保天下者十餘世秦二世關東盜起或以及
者聞二世怒下吏或曰逐捕今盡不足憂乃悅隋煬
帝時四方兵興左右近臣皆隱賊數不以實聞或言
賊多者即被詰責二帝以危亂滅亡為諱故秦隋之
宗社數年為墟陛下視今日天下之治孰與漢文威
制四夷孰與漢武國家基本仁德陛下慈孝愛民誠
萬萬于秦隋至于西有不臣之虜北有疆大之隣非
特閭巷盜賊之勢也自西虜叛命四年旁塞苦數擾
內地疲遠輸兵久于外而休息無期卒有乘弊而起

兵法所謂雖有智者不能善其後當此之時陛下當
夙夜憂懼所以慮事變而塞禍源也陛下延訪邊事
容納直言前世人主勤勞寬大未有能遠過者也然
未聞以宗廟為憂危亡為懼此賤臣所以感憤於邑
而不已也何者令命數更恩寵過濫賜與不節此三
者戒之慎之在陛下所行耳非有難動之勢也而因
循不革弊壞日甚臣是以謂陛下未以宗廟為憂危
亡為懼者以此夫命令者人主所以垂信于下也異
時民間聞朝廷降一命令皆竦視之今則不然皆相

與竊語以為不久當更既而信然此命令日輕于下也命令輕則朝廷不尊矣又聞群臣有獻忠謀者陛下始甚聽之後復一人沮之則意移矣忠言者以信之不能終頗自絀其謀以為無益此命令數更之弊也夫爵賞陛下所持之柄也近時外戚內臣以及世或因緣以求恩澤從中而下謂之內降臣聞唐氏衰政或母后專制或妃主擅朝結恩私黨名為斜封今陛下威柄自出外戚內臣賢而才者與大臣公議而進之何必襲斜封之弊哉且使大臣從之則壞陛下

紀綱不從則沮陛下德音壞紀綱則忠臣所不忍為沮德音則威柄日輕且盡公不阿朝廷所以責大臣今乃自以私昵撓之而欲責大臣之守正不難矣此恩寵過濫之弊也夫賜與國家當以勸功也此年以來嬪御及伶官大醫之屬賜與過厚人間傳言內帑金帛皆祖宗累朝積聚陛下用之不甚愛惜今之所存無幾踈遠之人誠不知內府豐匱之數但見取于民者日煩即知當于公帑者不厚臣亦知國家自西方用兵用度寔廣帑藏之積未必皆為賜予所費然

下民不可家喻而戶曉獨見陛下行事感動耳往歲
聞邊將王珪以力戰賜金則無不悅服或見優人所
得厚則往々憤嘆人情不可不察此賜予不節之弊
也臣所論三事皆人所共知近臣從諛而不言以至
今日方今非獨夷狄之為患朝政日弊而陛下不寤人
心日危而陛下不知故臣願先正于內以正于外庶
後忠謀漸進綱紀漸舉國用漸足士心漸奮夷狄之
患庶于息矣伏唯陛下深察秦隋惡聞忠言所以亡
遠法漢主不諱危亂所以存日新盛德與民更始則

天下幸甚改常丞知涇州以右司諫知渭州兼領涇
原路經略公事會鄭戩為陝西四路都總管遣劉滬
董士廉城永洛以通秦渭援兵洙以為前此屢困于
賊者正由城寨多而兵勢分也今又益城不可奏罷
之時鄭戩已解四路而奏滬等督役如故洙不平遣
人召滬再不至命張忠往代之又不受于是諭狄青
攝滬士廉下吏戩論奏不已于是徙知慶州而卒城
永洛又徙晉州遷起居舍人直龍圖閣知潞州士廉
詣闕上書訟洙乃遣御史劉湜就問獨不能得洙罪

正坐假公用錢與部將孫用及私自貸貶崇信軍節
度副使孫用者本軍校嘗自京師取息錢至官不能
償涖與狄青惜其材可用遂假公使錢使償之徙監
均州酒稅感疾公牒至南陽訪醫卒四十七涖內剛
而外和與人言必極辨其是非遇事無難易敢于有
爲至前世治亂沿革之變靡不該貫人有疑難不能
通涖為指畫講解皆釋然自得尤長于春秋文章自
唐宋歷五代氣格卑弱至本朝柳開始為古學天聖
初涖與穆脩大振起之有集二十七卷子朴構其兄

源亦以文學名于世終太常博士

墓表

韓忠獻公

公諱涖字師魯其先太原人曾祖誼以道晦亂世不
仕祖文化始以才行與其家官至都官郎中贈刑部
侍郎父仲宜舉明經累長郡邑廉恕明決所至以循
吏稱終虞部員外郎以公貴贈工部郎中刑部葬其
父河南今為河南人公幼聰敏喜學無不通尤長于
春秋善議論參質古今開判疑滯聞者欣服之天聖
二年登進士第授絳州正平縣主簿歷河南府戶曹

叅軍邵武軍判官舉書判拔萃遷山南東道節度掌書記知河南府伊陽縣時天下無事政闕不講以言兵者為妄人公乃著敘燕息戍等十數篇以斥時弊時人服其有經世之才文康王公知而薦之召試充館閣校勘遷太子中允時文正范公治開封府每奏事見上論時政指丞相過失貶知饒州余公安道工䟽論救坐以朋黨貶監筠州酒稅公慨然上言曰臣以仲淹忠諫有素義兼師友以靖比臣臣當從坐貶信崇軍節度掌書記監郢州商稅歐陽公永叔移書

讓諫官不言又貶夷陵令當是時天下稱為四賢徙唐州丁父憂除服復得太子中允知河南府長水縣趙元昊反康定元年春寇延州大將劉平逆戰陷虜天子乃命文莊夏公都部署陝西之兵開府永興軍以經略招討之予與范公為之副公為判官未幾遣翰學士晁公宗慤入內都知王守忠督出兵攻賊合府議奏曰今將興兵尚未習練願謹邊防期以歲月平之使還而賊復寇鎮戎軍部將劉繼宗禦之為賊所敗詔下切責俾以進兵月日來上府中復議曰將

在軍雖得以自便然攻守大計當稟算于朝廷乃畫
攻守二策余與公詣闕奏之唯上所擇詔取攻策已
而難之事方寢賊遣人以書叩延州偽請和而大舉
兵寇涇原之山外殺部署任福公時在慶州得涇原
求援書即移文慶帥率其部將劉政銳卒數千人便
道走鎮戎未至賊引去夏公奏公為專使通判濠州
又改秦州遷知涇州徙渭州兼管勾涇原路經略部
署司事涇原兼管帥懷敏覆軍之後傷夷殘缺千鎊
百漏公夙夜撫葺一道以完時宣徽使鄭公為陝西

四路帥主靜邊寨主劉滄議遣其屬官著作佐郎董
士廉與滄于章川保南人諸羌中開道二百里修永
洛城以通秦之援兵公曰賊數犯塞必併兵一道五
路帥之戰兵嘗不登二萬人而當賊舉國之衆吾兵
所以屢為賊困者由黃石河路來援雖遠永洛路二
日而援師安然以濟今無故奪諸羌田二百里列堡
屯師坐耗芻糧不勝計以冀秦援一二日之速則吾
兵愈分而邊用不給矣乃奏罷之便詔從之會鄭以
府罷改知永興軍乃署前帥牒飭滄等督役如初二

人者遂不奉詔興作不已公遣人召滬者再不至乃命瓦亭寨主張忠代滬滬復不受代部署狄公于是親至德順軍攝滬士庶下獄差官按問而鄭比奏本道沮滬等功朝廷卒薄滬等罪徙公慶州而城永洛馬慶帥孫公請終任改知晉州慶曆四年契丹遣使報西伐元昊詔河陝三路要郡皆擇人徙知潞州當范公之在二府也余安道歐陽永叔輩並為諫官天下屬望諸公日竭忠獻納不避權貴而公方勤勞塞上述遠朝廷暨諸公相繼罷去何天下目之為賢者

執政指之為黨皆欲因事斥逐之士廉者即詣闕上書以求洛事訟公且誣公在渭日盜錢制使承風指按驗百端不能得一毫以汙公有部將孫用者出于軍校嘗自京取民息錢至官貧不能償公與狄公惜其材乃分假公使錢俾償其民而月取其俸償于官逮按問而錢已輸官矣坐此貶公崇信軍節度副使徙監均州酒稅得疾沿牒至南陽訪醫藥疾革對賓客妻子無一憾言慙冠帶盥濯怡然隱几而卒時年四十七慶曆七年四月十日也公天性慈仁內剛外

和凡事有小而可矜者必惻然不忍發見言貌及臨
大節斷大事則心如金石雖鼎鑊前列不可變也在
軍謙勤愛士雖悍夫冗列皆降意容接故人入顧盡
其力所至郡邑修設條教務以實惠及下去則人思
之文章自唐衰歷歷五代日淪淺俗寢以大敝本朝
柳公仲塗始以古道發明之後卒不能振天聖初獨
與穆叅軍伯長橋時所尚力以古文為主次得歐陽
永叔以雄詞鼓動之于是後學大悟文風一變使我
宋之文章將踰唐漢而躡三代者公之功為最多初

朝廷之將用攻策也命葛懷敏出廊延道勒其綏宥
間攻積聚招懷種族奪其要害而保障之賊知朝
廷之威必翻然來服則久而易制公曰是行也不患
將卒無勇患應敵寡謀耳乃自請叅議懷敏行營軍
事有詔如請而事中罷今夫文武之士平居議論恍
慨自謂忠義勇決世無及者一旦遇急難而試之往
往魄喪氣奪百計避脫雖以富貴誘之猶掉臂而不
顧余居邊久閱人多矣如公挺然忘身以為國家者
天下不知有幾人嗚呼以公文武之才筆筆然震暴

天下之如是曾不得一紓所蘊于公卿之位輔致太平之業而反遭羅讒毀遂終貶官此當世守道之士所以仰天嘆呼疑為善而得禍而中人者引以為監思擇利而自安也然上以聰明仁恕御天下一細民之枉必矜而獲辨如公以文致其罪者未有抑而不申者也故當時指以黨排去者不三四年間皆復顯官處大任使公年且及此其進擢可量哉柰何乎天不與公之壽也悲夫公累遷官至起居舍人直龍圖閣娶張氏廩邑縣君以仁以慈克正道家後公七年而亡兄源太常博士亦以文行稱于世弟湘三班奉職冲秀州華亭縣主簿濤泳未仕並先而卒沂資性淳茂動謹門法子男四人長曰朴奇雋博學有父風其二未名俱早世其幼曰構今方十歲女五人長適虞部員外郎張景憲次繼適張氏次適太常寺太祝謝景年次二人未嫁姪材文學器識足以嗣公而敦尚名節無仕進意至和元年十二月日沂材舉公夫人之喪葬于緱氏縣某鄉之某原從吉卜也范公嘗以書謂予曰世之知師魯者莫如公余已為其集序

矣墓有表請公文以信後世余應之曰余實知師魯者又得其進斥本末為最詳其敢以辭既實書其事矣又考性命之說而表于墓曰

嗚呼自古聖賢必推性命如公之文武傑立而貫以忠義兮此天之性位不大顯遭讒而跌且不壽兮此天之命雖孔孟不能以兼通兮尚一歸于默定昧者不思而妄求兮徒自奔于邪徑故公臨禍福生死而曾不少變兮是能安性而歸正唯大名赫然日月之光兮亘萬古而增榮吾聞善人者天必報其後兮宜

嗣人之蒙慶

祭文

韓忠獻公

維慶曆七年某月某朔某日具官某謹以清酌庶羞之奠致祭于故龍圖舍人尹君師魯之靈嗚呼師魯惟君之生天與英奇如鑑之明無隱不窺如材之美無用不宜仁義之勇過于虎熊疑昧之決審于蒼龜首倡古文三代是追學者翕從聖道乃夷名重天下無人不知知之深者非余而誰伊昔夏人擾于西垂余忝兵任君實同之周旋塞上余徃君隨晝籌夜畫

悲睡恣飢星霜矢石勞苦艱巖凡四五年心憊形羸
退而視君志不少衰上嘉君勤進督渭師懷敏之後
破壞創痍君能盡力補綴撐持曰兵曰民以治以綏
如得父母衆心熙熙保邊務實耻于妄為不合小人
乃啟禍基易慶晉潞奔命何疲輸忠抗論同者乘危
君前在渭屬防秋時以公辭緣貸其偏裨裨償宿負
免于典彝月取其俸送官勿虧且責効命投死無疑
職此抵罪竄斥流離衆謂之寃君甘如飴自隨徙均
帝方念茲奈何窮山感疾無醫君決不起指節而馳
范公大賢來托孤遺謂無怛化言色怡怡忽整衣冠
盥滌莊祇憑几而逝衆皆嘆悲范公之書其說如斯
嗚呼哀哉彼蒼冥冥莫可究推賢者胡惡動與屯奇
不肖胡祐坐來福禧以道而屯死為人思以幸而福
生為人嗤在君所得何必期頤嗚呼哀哉余之與君
義雖朋執情則墳篋葬不執紼奠不奉卮使我大恨
痛切肝脾徒憑薄祭一寫哀辭琴不鼓矣嗚呼子期
尚饗

墓誌

歐陽文忠公

師魯河南人姓尹氏諱洙然天下之士識與不識皆稱之曰師魯蓋其名重當世而世之知師魯者或推其文學或高其議論或多其材能至其忠義之節處窮^達臨禍福無愧于古君子則天下之稱師魯者未必盡知之師魯為文章簡而有法博學彊記通知今古長于春秋其與人言是是非非務窮盡道理乃已不為苟止而妄隨而人亦罕能過也遇事無難易而勇于敢為其所以見稱于世者亦所以取嫉于人故其卒窮以死師魯少舉進士及第為絳州正平縣主簿

河南府戶曹叅軍邵武軍判官舉書判拔萃遷山南東道掌書記知伊陽縣王文康公薦其才召試充館閣校勘遷太子中允天章閣待制范公貶饒州諫官御史不肯言師魯上書言仲淹臣之師友願得俱貶貶監鄂州酒稅又徙唐州遭父喪服除復得太子中允知河南縣趙元昊反陝西用兵大將葛懷敏奏起為經略判官師魯雖用懷敏辟而尤為經略使韓公所深知其後諸將敗于好水韓公降知秦州師魯亦徙通判濠州久之韓公奏得通判秦州遷知涇州又

知渭州兼涇原路經畧部署坐城永洛與邊臣異議
徙知晉州又知潞州為政有惠愛潞州人至今思之
累遷官至起居舍人直龍圖閣師魯當天下無事獨
喜論兵為叙燕息戍二篇行于世自西兵起凡五六
歲未嘗不在其間故其論議亦精密而于西事尤習
其詳其為兵制之說述戰守勝敗之要盡當今之利
害又欲訓士兵代戍卒以減邊用為禦戎長久之策
皆未及施而為元昊臣西兵解嚴師魯亦去而得罪
矣然則天下之稱師魯者于其材能亦未必盡知之

也初師魯在渭州將吏有違其節度者欲按軍法斬
之而不果其後吏至京師訟師魯以公使錢貸部將
貶崇信軍節度副使徙監均州酒稅得疾無醫藥身
至南陽求醫疾革隱几而坐顧稚子在前無甚憐之
色與賓客言終不及其私享年四十有六以卒師魯
娶張氏其縣君有兄源字子漸亦以文學知名前一
歲卒師魯凡十年間三貶官喪其父又喪其兄有子
四人連喪其三女一適人亦卒而其身終以貶死二
子三歲四女未嫁家無餘貲客其喪于南陽不能歸

平生故人無遠邇皆往賻之然後妻子得以其柩歸
河南以其年某月某日葬于先塋之次余與師魯兄
弟交嘗銘其父之墓矣故不復次其世家焉銘曰
藏之深固之密石可朽銘不滅

論尹師魯墓誌

歐陽文忠公

誌言天下之人識與不識皆知師魯文學議論材能
則文學之長議論之高材能之美不言可知又恐大
略故條新其事再述于後述其文則曰簡而有法此一
句在孔子六經惟春秋可當之其他經非孔子自作

文章故雖有法而不簡也條于師魯之文不薄矣而
世之無識者不考文之輕重但責言之多少云師魯
文章不合祇著一句道了既述其文則又述其學曰
通知古今此語若必求其可當者惟孔孟也既述其
學則又述其論議云是是非非務盡其道理不苟止
而妄隨亦非孟子不可當此語既述其論議則又述
其材能條言師魯歷貶自兵興使在陝西尤深知西
事未及施為而元昊臣師魯得罪使天下之人盡知
師魯材能此三者皆君子之極美然在師魯猶為末

事其大節乃篤于仁義窮達禍福不愧古人其事不可偏舉故舉其要者一兩事以取信如上書論范公而自請同貶臨死而語不及私則平生忠義可知也其臨窮達禍福不愧古人又可知也既已具言其文學其議論其材能其忠義遂又言其為仇人挾情論告以貶死又言其死後妻子困窮之狀欲使後世知有如此人以如此事廢死至于妻子如此困窮所以深痛死者切責當世君子致斯人之及此也春秋之義痛之益至則其辭益深子般卒是也詩人之意責

之愈切則其言愈緩君子借若是也不必號天叫屈然後為師魯稱怨也故于其銘文但云藏之深固之密石可朽銘不滅意謂舉世無可告語但深藏牢埋此銘使其不朽則後世必有知師魯者其語緩其意愈切詩人之義也而世之無識者乃云銘文不合不講德不辨師魯以非罪蓋為其前言窮達禍福無媿古人則必不犯法况是仇人所告故不必區、曲辨也今止直言所坐自然知非罪矣添之無害故勉徇議者添之若作古文自師魯始則前有穆脩鄭條輩

及有大宋先達甚多不敢斷自師魯始也偶儻之文苟合于理未必為非故不是此而非彼也若謂近年古文自師魯始則范公祭文已言之矣可以互見不必重出也皇甫湜韓文公墓誌李翱行狀亦不必同亦互見也誌云師魯喜論兵論兵儒者末事言喜無害喜非嬉戲之戲喜者好也君子固有所好矣孔子言回也好學豈是薄顏回乎後生小子未經師友苟恣所見豈足聽哉脩見韓退之與孟郊聯句便似孟郊詩與樊宗師作誌便以樊文慕其如此故師魯之誌用意特深而語簡蓋為師魯文簡而意深又思平生作文惟師魯一見展卷疾讀五行俱下便曉人深處因謂死者有知必受此文所以慰吾亡友爾豈恤小子輩哉

祭文

歐陽文忠公

維年月日具官歐陽脩謹以清酌庶羞之奠祭于亡友師魯十二兄之靈曰嗟乎師魯辨足以窮萬物而不能當一獄吏志可以扶四海而無所措其一身窮山之崖野水之濱猿狖之窟麋鹿之群猶不容于其間

兮遂即萬鬼而為鄰嗟乎世之惡予之多未必若愛
予之衆何其窮而至此兮得非命在乎天而不在乎
人方其奔顛乍逐困危難屯舉世皆寃而語言未嘗
以自及以窮至死而妻子不見其悲忻用舍進退屈
伸語默夫何能然乃學之力至其握手為訣隱几待
終顏色不變笑語從容死生之間既已能通于性命
憂患之至宜其不累于心曾自予云逝善人且哀予
能達予又何悲惟其師友之益平生之舊情之難忘
言不可究嗟乎師魯自古有死皆歸無物惟聖與賢
雖埋不沒尤于文章卓若星日子之所為後世師法
雖嗣子尚幼未足以付予而世人藏之庶可無墜失
予于衆人最愛子文寫辭千里備此一尊冀以慰子
聞乎不聞尚饗

乞與尹構一官狀

歐陽文忠公

右臣等伏見故起居舍人直龍圖閣尹洙文學議論
為當世所稱忠義剛正有古人之節初蒙朝廷擢在
館閣而能不畏權臣力排衆黨以論范仲淹事遂坐
貶黜其後元昊僭叛用兵一方當國家有西顧之憂

思得材謀之臣以濟多事而洙自初出師至于元昊
納款始終常在兵間比一時之人最為宣力而群邪
醜正誣構百端卒陷罪辜流竄以死嚮蒙陛下仁聖
息憐哀其冤枉特賜清雪俾復官資足以感動人心
勸勵忠義今洙孤幼並在西京家道屢空衣食不給
洙止一男構年方十餘歲惻然無依實可嗟惻伏見
將來祫享大禮在近郡臣皆得奏蔭子孫伏望聖慈
錄洙遺忠憫洙不幸特賜其子一官庶霑寸祿以免
饑寒則天地之仁豈顯蒙德臣等忝列侍從愧無獻
納苟有所見不敢不言

雜見事跡

先是渭州西路巡檢劉滬建策以為秦渭兩路有急
發兵相援路出隴坻之內回遠恐不及事請募熟戶
以山外築永洛結公二城以兵戍之緩急以通援兵
之路都部署鄭戩以狀聞命滬及董士廉董其後會
韓琦宣撫陝西還奏罷四路招討以戩知永興軍又
言兩城之旁多生戶今奪其地恐城未畢而寇至請
罷之戩極言二城之利不可輒罷詔三司副使魚周

詢往視其利害未至尹洙召滬士廉令還滬士廉以
熟路既集官物無所付請遂城之洙怒以二人違節
制命部署狄青往斬之青繫滬士廉于順德軍及魚
周詢還是戩議乃徙洙慶州

洙水
記聞

尹師魯謫官均州時范希文知鄧州師魯得疾即擅
去官詣鄧州以後事屬希文希文日往視其疾一旦
遣人招希文甚遽既至師魯曰洙今日必死矣人言
將死者必見鬼神此不可信洙並無所見但覺氣息
奄奄就盡隱几坐與希文語久之謂希文曰公可出

洙將逝希文出至廳事已聞其家號哭希文竭力送

其喪及妻孥歸洛陽

洙水
記聞

知道者苟未脫然隨其所得淺深有効驗尹師魯自
直龍圖閣謫官過梁下與一佛者談師魯自言以靜
退為樂其人曰此猶有所係不若進退兩忘師魯頹
若有所得自為文以記其說後移定州是時范文正
公守南陽少日師魯忽奉書與文正別仍囑以後事
文正極訝之時方饌客掌書記朱炎在坐炎若人好
佛學文正以師魯書示炎曰師魯遷謫失意遂至垂

理殊可怪也宜往見之為開譬之無使成疾矣即詣
尹而師魯已沐浴衣冠而坐見矣來道文正意而笑
何希文猶以生人見待洙死矣與炎談論頃時遂隱
几而卒炎急使人持報文正文正至哭之甚哀師魯
忽舉頭曰早已與公別安用復來文正驚問所以師
魯笑曰死生常理也希文豈不達此又問其後事尹
曰此在公耳乃揖希文復逝俄頃又舉頭顧希文曰
亦無鬼神亦無恐怖言訖遂往師魯所養至此可謂
有力矣尚未能脫有無之見何也得非進退兩亡猶

存胃中

歟

沈存中
筆談

本朝古文柳開仲塗穆脩伯長首為之倡尹洙師魯
兄弟繼其後歐陽文忠公蚤工偶儷之文及官河南
始得師魯乃出韓退之文學之蓋公與師魯于文雖
不同公為古文則居師魯後也如五代史公嘗與師
魯約分撰其後史魯死無子今歐陽公五代史頌之
學官盛行于世內果有師魯之文乎抑歐陽公自為
之也歐陽公誌師魯墓論其文曰簡而有法且謂人曰
在孔子六經中唯春秋可當則歐陽公于師魯不薄

矣崇寧間改脩神宗正史歐陽公乃云同時有尹洙者亦為古文然洙才下不足以望修云蓋史官皆晚學小生不知前輩文章淵源自有次第也

錄聞見

天聖明道中錢文僖公自樞密留守西都謝希深為通判歐陽永叔為推官尹師魯為掌書記梅聖俞為主簿皆天下之士錢相因府第起雙桂樓西城建臨園驛命永叔師魯作記永叔文先成九千餘言師魯曰洙止用五百字可記文成永叔服其簡古永叔自

此始為古文

錄聞見

尹洙當慶曆中與范仲淹等友善仲淹等罷朝政洙亦為人希時宰意攻以居渭州時事遂置獄遣劉湜按之一日謂洙曰龍圖得罪死矣洙請其事湜曰龍圖以銀為偏提給銀有記而收偏提無籍是以知龍圖當得罪死也洙曰此不足以致洙罪也以銀為偏提用某工校主之附某籍可取視之湜閱籍果然知不能害嘆息而已其後洙在隨州而孫甫之翰知安州過隨二人皆好辯論對榻語幾月無所不道而洙未嘗有一言及湜者甫問曰劉湜按師魯欲致師魯

于死而師魯絕口未嘗有一言及湜何也湜曰湜與
洙本未嘗不足之意其希用事者意欲害洙乃湜不
能自樹耳洙何恨于湜乎甫深服其器量之大之翰又
言尹洙自謂平生好善之深過于嫉惡之翰以為信

然南豐
雜識

韓魏公曰希文嘗勸以身安而後國家可保師魯以
為不然直以謂臨國事更不當顧身公雖重希文之

說然性之所喜以師魯為慊爾

魏公
別錄

河南集附錄終

師魯集二十七卷承旨

姚公手錄本予往嘗刻

師魯文百篇于會稽行

臺今迺得閱其全集甚

慰因復梓行之我朝古

文之盛倡自師魯

一再傳而後有歐陽氏

王氏曾氏然則師魯其

師資云

淳熙庚戌錫山尤袤延

之跋



